

四庫全書

史部

欽定四庫全書

欽定國子監志卷五十三

藝文

國家尊

聖典學禮制隆盛超邁前古臣等編輯監志首冠

綸言揆符先聖化美作人至於在監諸臣仰承

德意獻納論思考正典禮之宜講求教養之法章疏

具在用備參稽以及諸臣歌詠太平雍容揄揚

之什覽之可想見於樂辟雍之盛園橋觀聽之
儀別擇成編謹緝奏議三卷論著四卷詩賦五
卷為藝文

藝文一

奏議一

論教學事宜疏

順治元年

李若琳

近奉

聖旨滿洲官員子弟成就成均肄業仰見

朝廷作人盛典臣竊諮詢滿洲教規最為嚴密諸
生晨興入監日暮返舍而國學僻在城東北隅
諸子弟往返近者數里遠者二三十里晷短途
遥工夫耗於奔走諸生勞苦固不敢自惜但有
就學之名無進業之實在諸生亦相聚向臣頗
稱不便謹議得滿洲八旗各覓空房一所立為
書院將國學二廳六堂教官分教八旗子弟各
旗仍設學長四人俱就各旗書院居住朝夕誨

迪臣等不時親詣各書院稽察勤惰每月逢六
日各師長率衆子弟同進衙門臣等當堂考課
或作文或講書或背書或習字一一分別較試
各師徒工夫疎密與藝業進退以定諸生勸懲
之規即以存各師陟降之案庶學教不為虛文
而人才於是植立矣

請正

先師神牌諡號疏

順治二年

李若琳

臣聞之記曰凡始立學必釋奠於先聖先師自漢以來代以

孔子為先師蓋以

孔子刪述六經垂憲萬世人倫之所以常明道統之所以不墜

孔子之力也是以後世帝王莫不尊崇諡號嚴重祀典

聖朝承帝王正統垂意文教重道崇儒中外悅服

春秋二仲丁祭率由舊典視昔加祗於本月二十日太常寺奉禮部傳

諭新製

孔子牌位兼書清漢字

臣竊有請焉夫

孔子牌位奉安

文廟

孔子在天之靈所憑依者

臣愚以為宜令禮工二

部委官匠於本監製造新牌俟新牌告竣令

臣

等恭安

文廟然後撤舊牌焚之瘞所廢典制聿隆禮儀有序於以妥

先師之靈愜奉祀之忱為攸當矣臣愚又有說者

今

文廟現奉牌位稱

至聖先師孔子之位此明嘉靖九年大學士張璁建議所改置者也質之前代追尊諡號竊有未

當查自漢以來諡號不一至唐元宗始追諡為
文宣王宋真宗加諡至聖文宣王元成宗復加
諡大成至聖文宣王明朝自洪武至正德所稱
先師諡號一如元成宗舊制未之有改臣聞備古
今之至德者宜享古今之隆稱昔

孔子之贊乾坤曰大哉乾元至哉坤元曰大成曰
至聖洵非

孔子之德配乾坤者莫能當之今稱

至聖而遺大成得毋乾坤之義未備乎至曰文曰
宣按之諡法經緯天地曰文聖善周聞曰宣又

洵非

孔子之德兼君師者莫能當之今止稱

先師而遺諡號然則古之英君明辟可止曰某君

某王而去聖神文武之諡可乎張璪欲去封爵

而并除諡號非確論也

臣愚以為當今更新之

會宜追復舊諡仍稱

大成至聖文宣先師孔子之位庶至德鴻名

昭代倍為闡揚祀典於焉有光矣臣忝列儒臣職

司教典事關學宮直據所見其有當與否未敢

必也伏乞

勅下禮工二部建議施行

請儲養太學人材疏

順治二年

楊 櫨

臣惟士子霧隱之初作養教育在內則全在司

成在外則全藉提學令

聖主御極首重人材自一品至七品官員子弟皆收入
成均甚盛典也惟是士習日趨浮薄宜導之以
敦厚伏望

聖明飭行各衙門力挽古俗嚴斥澆風讀佛老隱僻之
書者罰穿紅紫靡麗之服者罰糾衆結黨把持
官府者罰呼朋引類武斷鄉曲者罰敦孝弟忠
信之風抑怪誕輕佻之習已成材者試以經濟
謀猷未成材者誨以小學六藝中有出類拔萃

文理通達者則拔其尤咨送禮部復加考校果
係真材實學即准擢用如是而青衿不喁喁向
風文教不彬彬振起者未之有也

論教學未便事宜疏

順治二年

薛所蘊

臣伏見

皇上開國之初首崇文教允前祭酒臣李若琳請清漢
子弟肄業成均甚盛舉也臣所蘊以庸陋下品
前任司業碌碌因人猶可覆短今蒙

聖恩拔為祭酒受

命欽承負乘滋懼因念

聖朝新政事事從實況教養人材何等關係而敢
以虛文塞責乎竊見滿洲學生皆沈毅聰俊之
質志趨向上但國學僻處城東北隅八旗子弟
遠者十五六里近亦十數里奔馳道路辰巳之
間始得到監申刻回家就食一日之中工課只
有午未二刻耳從來讀書早乘清明之氣晚親

燈火之光日中人倦非具時也況加之往來勞
頓精神昏惰是有讀書之名而無其實豈不負
朝廷棧樸作人之盛意哉臣再四思維比照

盛京例分旗就學既慮不便約束無已惟晝夜在
監誦讀朝夕提誨庶有實益臣所蘊已移住公
署矣而諸子弟號舍供給未有定議又似不能
即令棲止學宮也伏乞

勅下內院會同禮臣酌議或令工部少修學舍至於飲

饌之需

勅戶部酌量資給日就月將得人之効可拭目俟之而

臣等竊曠之罪亦庶幾或免矣

酌定伴讀監生疏

順治二年

薛所蘊

竊見滿洲子弟濟濟嚮學將來股肱心膂於是
馬出臣等與六館屬官督課於上至於耳提面
命必得學行諸生為之分教前監臣於順天府
丞咨送府學生員中收錄徐可行等五十名一

向在監伴讀但諸生多係貧寒平日以舌耕為業今倉庾未充勿敢請給廩餼而各生輪流授書不免推諉曠業今臣等於各旗下子弟分別粗知文義者令文義優長者教之初習講解者令通曉講解者教之誦讀寫倣者令書傳習熟字畫端楷者教之初學句讀未嫻漢語者令齒牙便利聲音宏亮者教之每旗約得四五人又有滿洲子弟志切上進力學攻苦者十餘人拔

置兩廂日夕訓迪亦每廂以二三學問該博監
生相為師友以資切磋第各生既無資給難以
責成合無開以功名之路俾鼓舞相成臣監造
花名冊二本一送內院一送禮部存照怠惰廢
教即行黜革若勤敏端良生徒進益或一年之
外三年之內咨送吏部考授州縣正佐教諭訓
導等官庶諸生樂於趨事裨益人材非淺鮮矣

薦賢疏

順治二年

薛所蘊

竊惟國學為教胄之司傳經育才領袖儒林職甚重也苟非其人鮮克勝任歷代開國之初肇啟辟雍必慎選碩儒或厚德堪樹儀型或博學可備問難良以成均義重師資道尊前人於斯凜凜慎之遠不具論元用許衡吳澄輩為祭酒一代文教媲美古昔有由然也

皇上初業之初即選清漢子弟弦誦澤宮作人之化度越往代而以臣謏陋濫竽司成心竊愧乏訪得

保定府容城縣舉人孫奇逢以庚子賢書隱居
教授四十餘年學深稽古志切希賢澹泊寧靜
絕意仕進遠邇之人聞風矜式伏求

特下弓旌徵聘出山以長成均師道立而善人多其庶
幾乎至於六館分教亦須老成淹雅之士又察
山西襄陵縣舉人李推河南濟源縣舉人吳舉
皓首窮經舌耕自給布袍蔬食泊如也一為臣
舊治一為臣同里知之最悉均應

勅部錄用以充六堂之選敷教東序流訓上庠人文丕
變必有蒸蒸蔚起者矣江南新定經迷之士不
乏鴻碩然而近取目前臣竊敢附於舉知之義
伏祈

聖鑒施行

請作養在監生員疏

順治二年

薛所蘊

竊惟

新朝啟運文教肇興如清漢官子弟嚮學事宜臣

皆有疏請

旨遵行矣惟有前監臣李若琳當滿洲子弟初入成均
之日因分教乏人移文順天府考取府學生員
以充伴讀該府咨送生員文士英等一百零四
名除八旗分用伴讀四十名外尚餘六十四名
前監臣念太學空虛留監肄業誠事理之宜然
者但此項諸生未經奏

聞該學既已除名辟雍尚無定議非庠非監將來何以

為出身地乎況各生數月以來在監誦習儘有
德造之彥而秋闈伊邇應試之額寥寥未充合
無即與各學臣考送諸生一體督課目前備棘
闈之試將來儲思皇之選於作養人材之意未
必無小補也除造清冊二本一送內院一送禮
部備照外伏祈

聖鑒施行

請定監規疏

順治三年

薛所蘊

伏蒙

皇上允前祭酒臣李若琳請官員子弟許入監讀書又
准禮臣覆議直省學臣各學選取生員一二名
以充貢監並送成均肄業此一代文治肇興之
始萬年鼎運宏開之基也數月以來嚮學諸生
亦既濟濟而監規未頒教習年限及出身條例
未定臣愚隕越滋懼竊恐無以為多士勸也考
太學之規歷代隆重元朝尤為詳密明初踵而

行之得人為盛在監生徒多者至一萬四五千
少亦不下數千其間教有條學有法選用有格
故人材輩出而積薪無嘆非偶然耳臣謹準往
酌今定為四條一積分積分之法元許衡行之
最為得力明亦倣其意而用之今供給未備士
之貧無資斧者更多似難概責之各生也中有
資分敏達願考積分者除常課外每月一試一
年以十二次一等為及格免其撥厯徑送內院

廷試與恩貢一體考職選授或於本經之外別兼
一經通曉大義准作三分五經兼貫雖文不及
格准作八分精熟通鑑全部准作五分每試考
首一次准作二分一監期考舊例舉官恩生坐
監六個月滿歲貢八個月舊附十箇月新附二
十四箇月今舉人無坐監者且罷援納之例則
無所謂新舊附之別但各學臣送考者謂之貢
監生品官子弟謂之官監生二者而已貢監多

拔自優等且在原學食餼距貢期逼近今既乏廩餼又杳無出身之期不幾以優之者困之歟謹議貢監原係廩生者立限十四月增附十六月至官員子弟資給少裕兼多青年志學立限二十四月務期學問精進然後撥各衙門歷練政務具有願留應試者聽一歷事學者博通書史猶必練習時務然後服官分政可見施行舊例監生監滿撥歷即新進士分撥各衙門觀政

之意也昔人教法寓指深遠但沿習既久虛文
塞責厯事歲月雖多大抵徒掛空名今須著實
舉行讀書期滿仍照舊規分派各衙門厯事以
一年為期但務使實實練習通曉政體然後送

內院

廷試與恩歲貢一體考職選授一補曠諸生家鄉
遠近不同貧富互異或肄業成均資斧不繼則
回籍奏取或各官子弟送親赴任以及寒暑疾

病不得不量准給假然非預定補曠之規則優
游逸豫竟作實歷何以課進修之功効乎今議
凡告假日期俱作曠候補過限不到計日倍罰
有不請假而徑自曠學者即行黜革庶人知策
勵而進取日益以上四條伏候

聖裁以便遵行

請復貢生坐監之例疏

順治十年

孫栢齡

臣惟國學之設原以陶育人才風示四方取前

代廣厲學官之意首善自京師始故每歲各省貢士無論恩拔副榜皆入成均此定例也逮我朝開闢之初一時地方需才故不待教育許其即

赴

廷試授以州縣佐貳等官原係一時權宜之計非云經久不變者也今行之既久每歲

廷試多人吏部不能即選率多壅滯之嘆且貢生既不入國學國學益寥寥無人不及外省州縣

之半甚非所以尊京師風示四方也又士之初
離草茅者無論賢愚皆得捷取功名僥倖既多
冒濫益甚臣愚以為自今歲以後各省貢監皆
當仍遵舊例赴國子監讀書並

勅令國子監諸臣嚴加考核汰其不肖待其學業習成
咨部

廷試所遲不過歲餘一以疏銓曹積薪之弊一以
杜人心倖進之端其於風化非小補矣

請增滿洲肄業疏

順治十七年

孫廷銓

臣聞古語曰十年樹木百年樹人言儲材當豫也今滿洲子弟俊秀者正不乏人科甲既停學問益寡殊為可惜稽之漢代期門羽林之士皆誦孝經誠以經學為人才之本教化之源也目今從龍之彥固自多人深恐後學不繼致令有乏材之嘆今查國學內每佐領下止有一人肄業似屬太少今酌量每佐領下再各添一人更

選老成敦大通治體明經術之臣以為之師務
俾晚暢大義以備

國家之用數年以後將見人才濟濟而文武之選
皆得其人矣

請嚴國學官學疏

康熙六年

王熙

竊唯

朝廷興學右文既以鄉會試收羅天下之人才國
子監教養各途之英俊而於八旗官學諸生復

選滿漢分旗教習其於儲才育士之道可謂詳
且備矣近者欽奉

恩詔一時滿漢官廕監生入國學者倍多於前又見部
覆議定各旗滿洲漢軍與漢人一體復行鄉試
會試業奉

諭旨則八旗官廕監生應照漢軍廕監生之例從國子
監應試其八旗官學生亦應照漢人考取應試
矣臣愚以為使之應試者

朝廷鼓舞人才之盛心而求其有以仰副

國家作人大典者師儒教導之實事也查漢監生
入監必分堂撥班先以月課繼以季考教法可
謂詳備具八旗官廕監生習滿書者原有滿官
稽考教訓其習漢書者似應一體分派漢博士
助教等官設立課程定期稽查必使各習一經
兼習史鑑詳為講解俾令貫通務期成材以收
實用至於八旗官學諸生定例每佐領各有二

人而考取錄用之時少有學問優長者則漢教習監生誤之也查教習一項向於恩拔歲副各監生中考取教習近年恩拔歲副乏人而旁及於納銀准例經御史傅感丁條奏部議以恩拔歲副無人仍由納銀准例此等當教習入監之時既不由於考取及充教習之日自難責其優通伊身學業尚當在質疑問難之時為人師範豈能有成德達材之益不過虛糜歲月覲補一

官無怪乎徒存官學之名而生徒無勤學之實也竊念納銀准例既不堪用恩拔歲副人數又少何若於舉人中願就教習者與恩拔歲副相兼考充教習此皆屢經考試之人較之納銀准例自不相同且舉人一項今既准其考授教授等官矣未有為漢生員師則有餘為官學生師則不足者也至於考取教習之法則應查照順治十五年前之例禮部會同該監嚴加考選

毋止委之該監視為具文其八旗官學習滿書
諸生原有滿洲助教等官分旗教習滿官司業
分翼稽查習漢書者亦應分派漢人助教等官
不時親到官學稽查教習之勤惰稱否以及諸
生之學業課程庶諸生教習各有責成而在國
學者既善其法在官學者復得其人將見文治
聿興英才蔚起於

朝廷儲才育士之盛典或少有裨也

請正從祀諸賢位號疏

康熙二十二年

王士禎

竊惟

文廟之祀從以四配十哲兩廡諸賢凡以紹述心傳功在萬世也臣詳閱會典諸書竊見從祀諸賢諸儒名號位次尚有未當有宜一併釐正者敬為我

皇上陳之十哲之位不稱名而稱子是已但自明嘉靖間議去封爵之後四科之內稱冉子者凡三殊

難辨識兩廡諸賢諸儒則直書其名而不稱子
視十子何遽懸殊臣愚以為宜將神位俱稱先
賢先儒某子之位而以諱註其旁以昭尊崇之
意者也至宋代周敦頤程顥程頤邵雍張載朱
熹六子闡明絕學遠紹洙泗之傳實超前代諸
儒明崇禎間遂將六子改稱先賢臣等竊以躬
及聖門者概稱先賢私淑者概稱先儒此以時
代論非以造詣論也今既改稱先賢未敢輕議

但位諸漢唐諸儒之上於世次殊有未安又諸
賢諸儒位次會典闕里志諸書所載與今太學
神位互有不同並宜詳議妥確通行天下學宮
著之

本朝會典以垂永久者也伏乞

睿鑒勅下禮部議覆施行

請增從祀理學真儒疏

康熙二十二年

王士禎

竊惟

至聖之道萬古為昭兩漢以來諸儒凡發明經傳踐履純正者皆得從祀兩廡俎豆千秋典至隆也臣查現在從事先儒外歷代諸儒有功聖門尚有當酌議增祀者敬為我

皇上陳之漢儒功在經傳如詩書春秋三禮授經諸儒皆已從祀而易獨無之按田何當漢初授易實為聖門商瞿嫡系此漢儒之當補祀者也鄭康成博稽六藝所註詩禮諸經百餘萬言史稱純

儒唐宋以來皆列從祀明嘉靖間始以張孚敬之議改祀於鄉公論久鬱此漢儒之當復祀者也程門弟子首推尹燾先儒稱其學窮根本德備中和考其出處本末毫無可議朱子之後推何基為正傳其學以立志為先居敬為要於大學中庸太極通書西銘皆有發揮此宋儒之當從祀者也至於明代理學實肇於霍州曹端其學以誠敬為主力闢邪說薛瑄稱其質純氣粹

理明心定為有明理學之冠禮部尚書章懋由
博返約歛華就實其學粹然一出於正難進易
退天下仰之國子監祭酒蔡清學以六經為正
宗以四書為嫡傳所著蒙引尤見窮理之功禮
部侍郎呂柟篤志聖賢之道其講學之要曰文
以載道行必顧言左春坊贊善羅洪先以躬行
之實學闡良知之真傳安貧樂道有簞瓢陋巷
之風刑部侍郎呂坤以理學為經濟有體有用

所著諸書皆鑿鑿可見施行以上六人操履篤實咸有著書發明聖道此明儒之當從祀者也又絳州貢生辛全生值明末力以正學為己任著書甚富以代稍近未敢輕議合無

勅下該地方官徵具遺書備

乙夜觀覽或亦可仰裨

聖學之萬一也伏乞

睿鑒勅下禮部議覆施行

請修經史刻板疏

康熙二十二年

王士禎

竊惟列聖道法之傳莫備於經歷代治亂之蹟
莫詳於史古帝王內聖外王之學不外經史而
畢具矣我

皇上聰明天縱宵旰不遑猶日

御講筵研精經史又以刊刻經書講義

頒賜諸臣典學之勤二帝三王蔑以尚矣查明代南北
兩雍皆有十三經注疏二十一史刻板今南監

版存否完缺久不可知惟國學所藏原版皮置御書樓此版一修於前朝萬厯二十三年再修於崇禎十二年自

本朝定鼎迄今四十餘載漫漶殘缺殆不可讀所宜及時修補庶幾事省功倍伏乞

勅下部議查其急宜修補者早為鳩工俾利缺悉為完書亦仰裨

聖朝文教之一端也至南監經史舊版併請

勅下江南督撫查明如未經散軼即行該省學臣收貯
儒學尊經閣中儲為副本於以嘉惠來學未必
無補也

監生回籍議

康熙二十五年

韓 莢

太學之設三代共之王制羣后之子卿大夫元
士之嫡子國之俊選諸侯之貢士皆造焉漢時
東京太學之盛至圜橋門而觀聽者以萬計外
國侍子亦來就學宋時亦有三舍之法以教育

多士我

皇上稽古石文崇儒重道今正當遠人嚮化聞風慕義
之時京師首善之地國學所以培養人材今歲
貢例監俊秀而外間舉選拔盛典皆

聖朝菁莪棫樸作人之盛德至意若因冒籍之弊而
盡驅南北之人各歸其鄉必至太學一空即令
其在監考試於鄉試之年各回原籍現在者必
不肯安心肄業在籍者必至裹足不前又八旗

教習皆拔其尤者方得與選此皆寒苦之士以
館餬口仍冀就試京闈今若驅令回籍不惟曠
其教習之職亦苦跋涉無資伏查定例京闈鄉
試原分南北二字號嚴禁其不相冒則可矣今
以南人之冒北字而驅之則北字廢乎留乎留
則太學皆北人廢則北人何罪而驅之出太學
乎臣以為欲禁冒籍如生員則自廩生教官縣
官上至提調官而止令其嚴加體訪違者照例

處分學臣亦無預焉如監生則責之祭酒司業
然今之監生多有不入太學肄業者請自今捐
納監生在吏禮兩部考試入場者悉令其歸監
考試詳取本籍地方官印結則頂冒之弊亦可
以少息矣至若主考之罪當罪之以不公不明
不應罪之以取中冒籍

聖明洞鑒不俟瀆陳欲清不公不明之弊仰祈我

皇上臨時簡用或令九卿選擇不論已未差遣務求得

人如所舉失當衆論喧譁舉者豈無聞見即應
參奏自効如被科道糾參得實一併擬罪而公
明彰著者量予旌擢庶考官鼓舞畏懼而弊又
可少息矣從古來有治人無治法今日科場之
弊乃人弊非法弊也御史條陳弊端固其職掌
然疏中欲排羣議斥之為鄉人壟斷臣南人也
不敢避嫌附和謹據實另議

監生回籍再議

康熙二十五年

韓 炎

王制諸侯貢士皆入太學即錫京辟雍所謂東西南北者是也無思不服先儒以為來觀者皆悅服豈有諸侯所貢而其人不足之理漢永平中臨雍之盛園橋門觀聽者蓋億萬人司馬光通鑑朱熹綱目皆書之以為實錄為盛事並非誇張至唐時士子有關節之弊宋時太學有橫議之風故明順天科場亦屢經情弊發覺從無有議及驅回本省就試者豈見不到此蓋勢不

可行今臺臣言監生場前有串通鄉人之弊場
後有無賴煽惑之弊然此等多不過什伯中之
一二餘何與焉是即所謂孤寒者也我

皇上至公至明方令議官員子弟另編字號是

聖心憐憫孤寒特為開其進身之路諸臣方會議遵行
而忽欲盡逐之使奔走失業近省已屬難堪閩
粵湖南雲貴之人豈不更加失所且另編字號
復試何人是適與

聖意相左也夫以一二不肖之徒而輒致數千百人之
驅除以暫行兩科之說而輕改四十餘年之制
度似非國體亦拂人情惟有恪遵

聖諭分別官皿號令兩不妨礙人情既平譁囂自息樊
竇亦清至公至便可以永行相應將臺臣鄭惟
孜所奏仍無庸議

請告平厄魯特之捷於太學疏

康熙三十五年

孫岳頒

竊惟自古帝王恭行天討殷宗克鬼方周宣伐玁狁未有親統大軍出險陟遠不數十日大功告成廓清沙漠又安邊境如我

皇上之神武首出隻遠百王者也

皇上自御極以來削平三逆掃蕩臺灣南朔東西並奉正朔乃有厄魯特噶爾丹者狡謀出沒擾亂邊陲逆天虐民罪在不赦

皇上念逆寇一日不靖邊民一日不安

睿謀獨斷衆論不撓且軍儲皆出

天庾轉餉數十萬石以安四海生靈之命繇

國家無疆之休天人叶應自興師以迄大捷僅七十日從此永無烽火之警是從來未有之大仁也師出之日水凍草枯及

御蹕經臨掘地則泉湧牧馬則草肥蓋天時地脉已早決於

宸算之中且分布諸軍調度規畫並出

皇上之指授噶爾丹棄而宵遁自謂可以免脫不知

神策預定於前諸軍會合環擊擒斬殆盡餘黨就降俘獲無算是從來未有之大智也地最險遠

皇上親舉玉趾日進一餐率數十萬衆踰天山渡瀚海如履平地而走康莊莫不忠義激發驍騰百倍是從來未有之大勇也凡屬臣民舉翹首

皇上迴鑾告成功以彰顯烈臣一介腐儒荷蒙

聖恩簡擢不獲効力塞外伏查禮記王制曰天子出征

孰有罪反釋奠於學以訊馘告即魯頌泮水之
詩亦曰矯矯虎臣在泮獻馘淑問如臯陶在泮
獻囚是三代時皆告捷於學也

皇上建千古未有之功則漢唐未舉行之盛事請自
皇上始之即不必有事於訊馘而專行釋奠昭告

文廟爰勒石太學原本六經非由臆說不妨與祭
告

闕里並行則文治與武功永昭垂於千秋矣

欽定國子監志卷五十三

欽定四庫全書

史部

欽定國子監志卷五十四

詳校官國子監司業臣納麟寶

編修臣程嘉謨覆勘

總校官檢討臣何思鈞

校對官主事臣陳文樞

謄錄監生臣許溶

欽定四庫全書

欽定國子監志卷五十四

藝文一

奏議二

請羅欽順從祀

孔廟疏

雍正二年

張伯行

欽惟我

皇上繼膺寶曆即褒崇

孔子五代加封王爵隆儒重道亘古未有

臣

查明

儒江西有羅欽順者德備諸躬道可淑世凡天
人性命之理仁義道德之旨靡不研究其蘊其
生平學術皆本躬行心得體驗親切實為後之
學者所共遵守至辭免吏部尚書閉戶潛修其
恬靜之風又為當時所共推服

臣謹案欽順之

學實得程朱正脈且有發明之功其立身高潔

年餘八十始終一節如從祀學宮洵可仰副

皇上隆儒重道之至意倘

臣言可採乞

勅下內閣九卿詳議施行

整飭八旗官學疏

雍正五年

孫嘉淦

臣於九月十三日蒙

皇上召見

特諭整理國子監事務臣親至八旗官學細心查閱見

助教教習各處齊集學生人等皆有功課教化

之興日新月盛皆我

皇上振興作育之明效也但其中尚有宜整飭者

臣謹

為

皇上陳之一學生宜擇也古者十五而入太學皆公卿

大夫之子弟與凡民之俊秀今八旗學生類多

髫齡尚未識字難與講貫又多無力之家目前

行走甚覺煩難不數年而告退則前功盡棄至

於富貴子弟類皆嬾於行走佐領瞻徇情面草

率申送教育雖勤人才不出

臣

查國子監行文

八旗取官學生每佐領下止取一人原指明官員子弟人可造就力可行走者而佐領申文之時不能留心簡擇伏望

勅諭八旗佐領嗣後送學官生務宜遵照定例取官員大族子弟年十五以上品貌端正姿性聰明者始行申送國子監祭酒司業當堂考驗可教者留之不可教者行文另換則人皆秀良而教化易興矣一學舍宜廣也臣查八旗學房每旗有

滿洲蒙古漢軍三處滿洲蒙古每學四五十人
漢軍學六七十人不等而每學房舍不過三四
間此三四間房內助教教習學生聚處其中擁
擠喧嚷難以用功據臣愚見現在房舍止可為
滿洲蒙古學房至漢軍學房人數既多漢人教
習亦處其中繙譯作文並宜地方寬敞始可專
心誦讀伏祈

皇上鴻恩每旗另給官房十餘間以為漢軍學房則肆

業有所而課程自專矣一教習宜勤也八旗教習每旗五人取貢生內文理通者充之凡官學生之講書作文者師事焉此教習五人自宜朝夕在館分徒授業功專而勤庶有成效但八旗教習每月領米二斛別無錢糧一切衣服薪水之需無以供給勢必別營生理因而分班督率每日一人輪流上學教習日更則學生之功課難於稽查且責成不專并教習之賢否亦難考

核臣愚以為宜照宗人府教習或

景山教習之例使飯食衣服足以自贍去其分班上學之陋規使日處其中每人名下分學生若干使盡心督課即以學生之勤惰定教習之賢否則教有常法學有專業考核易施而勸導自力矣臣一介庸愚識見淺陋每蒙

聖恩嘉獎常思勉竭愚衷國學之中事宜甚多謹以思慮所及條陳一二伏望

皇上採擇焉

整飭八旗官學議

雍正五年

康親王崇安

八旗設立官學原欲比戶皆霑教澤不必拘定門第但學滿文者可用幼稚之人其學漢文繙譯者必得十四五以上資性聰敏之人方易啟迪嗣後選官學生務令該佐領擇聰明俊秀子弟申送_臣等驗看交與國子監當堂考錄其年幼者令學滿文其稍長者令學漢文庶將來皆

可有成再查舊例八旗滿洲蒙古漢軍每佐領
下必送一人入學若拘於定例恐草率塞責若
聽其缺額又恐人數太少臣等酌定每旗設額
學生一百名內滿洲六十名蒙古二十名漢軍
二十名其滿洲六十名內照例分三十名在滿
洲書房習清字三十名在漢軍書房習漢字凡
有學生缺出通在一旗選擇不必拘定佐領之
數庶學生皆得秀良不致混行申送再查學舍

乃諸生講誦之所今每學止三四間一旗三學
共十三四間不等實屬狹隘應將現在官房交
還各該旗查收每旗另給官房一所二十餘間
量可容百人誦習者著本旗修理俾諸生聚處
其中則學舍寬適便於誦讀矣再查官學生習
漢字者每旗設教習貢生五人輪流更換功課
難以稽查應令該教習每名下各派定學生若
千人日處其中專心訓導則將來成否責有攸

歸查

景山現有漢教習十二人每名一月關銀二兩米
隨錢糧每年夏秋衣服各一套二年皮衣服一
套每日隨用肉菜煤炭等項該衙門領給今八
旗教習既不許其分班更換則應足其衣食除
每日薪蔬難於支給不必比照

景山外其每年銀米等項似應均照

景山之例則衣食充裕而課讀自勤矣至教習期

滿議叙國子監舊例皆用貢生三年期滿咨部
以知縣候選宗人府

景山現用舉人貢生三年期滿咨部以應得之缺

用_臣等伏思三年之內若不問其勤惰概行咨

部銓選恐有草率塞責希圖僥倖之弊嗣後八

旗教習入館國子監堂官不時稽查如有懶惰

者即行斥退不准議叙其勤慎無過者三年期

滿照例咨部以知縣候選如有善於誨誘精勤

不倦者再留教習三年俟六年期滿咨部以知縣即用如此則勤惰有分而善於誨誘者亦得久於其職至宗人府

景山教習除舉人原係候選知縣應照原議外其貢生教習似應均照此例分別議叙則各處教習皆知勉勵矣再八旗官學生向來皆無錢糧以故無力之家不能行走臣等查得八旗蒙

皇上鴻恩設教養兵滿洲三千六百八十名蒙古四百

八十名漢軍九百六十名滿洲蒙古每名一月
給銀三兩漢軍每名給銀二兩令其學習弓馬
所以惠愛八旗之人典至渥也但查八旗教養
兵有幼稚之人以充額數不能操弓上馬而官
學生年壯者往往挑選披甲臣等伏思今官學
生內有年壯而讀書遲鈍者令回旗披甲其所
出之缺選年幼者補之以習滿文俟其稍長并
學弓馬則彼此皆有裨益伏望

聖恩飭令八旗將教養兵額數滿洲分出三十名蒙古
十名漢軍十名將此五十名錢糧給官學生計
滿洲蒙古每名一月給銀一兩五錢漢軍每名
一兩則壯者既有錢糧以學弓馬幼者亦有錢
糧以學文藝長幼皆蒙

恩育文武皆得造就似應將八旗教養兵清查實數如
目前現缺五十名者即照數撥給官學如缺額
之數不及五十名者俟其將來缺出陸續撥給

官學以漸足五十名之數如此一轉移間則錢糧不必加增而官學生皆霑

聖恩鼓舞振興矣

請准助教學正會試疏

雍正五年

鄂爾奇

欽惟我

皇上培養人材振興文教海內讀書之士無不踴躍鼓舞思自奮於

聖人之世今

臣

監學正楊廷英等呈稱俱係舉人有志

上進并求題請邀

恩一體會試伏思廷英等被

聖主之德教際文運之昌明已叨一命之榮復切觀光
之願如蒙

天恩俞允准令會試恭候

命下臣等移咨禮部可也

請定八旗拔貢疏

雍正八年

孫嘉淦

欽惟我

皇上振興學校作育人材

特發帑金以為太學諸生肄業之資

皇恩普被率土歡欣但漢人貢生為數甚多而旗下選

拔不過數人臣前為學政考試八旗生員見其

材質聰俊氣宇軒昂者實繁有人而皆溺記誦

詞章之習不知返躬實踐修己治人之道似為

可惜臣之愚見仰懇

聖恩將旗下生員多行選拔每旗或拔八人或拔十人

令其入監肄業臣等與漢人貢生一體教導學
成之日恭候

皇上揀用則滿漢之人材日出於吏治民生必有裨益
或即以之補授助教等官使之督率生徒則八
旗官學益加振興矣

請設八旗額外助教疏

雍正八年

朱蘭泰

臣仰見

皇上加意人才振興官學八旗子弟無不鼓勵讀書蒸

蒸向化誠為

國家培植本根之至計

臣

查八旗官學每旗除蒙

古官學外滿洲漢軍官學生共八十人分為五
班每班十六人設立漢教習各一人專訓誨漢
文滿助教各二員一人統領三班一人統領兩
班訓誨繙譯之外凡遇冠昏告假偷安逃學等
事滿助教係旗人聞見親切酌量得宜易於彈
壓是滿助教一職責任最重

臣

衙門現今八旗

滿助教內出兵者一人教訓俄羅斯學生者一人二缺空懸令人久署臣思似此出差離任或遇陞遷事故之日需次無人考選有待勢不得不委員兼理兼理他旗則或曠本旗之職兼理彼學則或分此學之功請嗣後遇選拔助教之時於應補正缺外多考取十數人一同帶領引見以備陸續補放現在所懸助教二缺專令二人署理外其餘令其在學協同助教學習行走一則接

補簡便訓導不致間斷一則諳練有素實任易
於見功師弟之間均收裨益矣

請給官房疏

雍正九年

孫嘉淦

竊照各省拔貢蒙

皇上加恩作養雲集都門其中教書投親在外居住者
固有而外無館地必須在監居住者約有三百
餘人六堂之內只可誦讀難於栖止是以拔貢
人等多在附近賃房居住查國子監門外方家

衙衙官房一所舊有二百餘間現今只存一百四十二間屋宇墻垣亦多傾圯無人居住而與國子監甚近相去不過數步仰懇

聖恩將此官房賞給國子監衙門

臣等仰懇

皇上每年賞給公費銀兩內動支修葺完好令拔貢及助教人等居住其中就近肄業則房屋既不致坍塌而各省士子食宿皆便並沐

皇仁於無既矣

請復元儒吳澄從祀疏

乾隆二年

甘汝來

臣竊惟表章先賢乃盛世崇儒之曠舉釐正祀典尤聖王議禮之鴻模伏考元儒吳澄天姿英異少時即知用力聖賢之學致踐履之實以道自任因而著書立說師表當世其自勵則有勤謹敬和自新自修克己悔過矯輕警惰等銘其教學則有學基學統等篇又考証孝經校定易詩書春秋修正儀禮戴記各有纂言又校定皇

極經世及老莊太元樂律等書皆所以啟大教之堂奧為後學之津梁者也至其德性純粹氣象春容言規行矩可法可傳施教成均則師道尊重進講經筵則誠意深摯昔人謂其進學之勇見道之真周程張朱莫或過之非虛語也明宣德時禮部尚書胡濙等僉議吳澄為元大儒有功名教詔准從祀殆將百年及嘉靖初輔臣張璁謬引謝鐸之議以澄生宋仕元遂黜其祀

不知澄之在宋雖膺鄉薦未叨一命宋制鄉薦不第者仍充生員澄並未登第固依然常布耳及天下歸元已久率土皆臣矣君相數聘不已乃猶十召而不起甫進而旋退官止於師儒職專於文學出處之際卓然君子總反以是而貶之亦謬矣況元之大儒惟許衡與吳澄二人澄固宋之逸士衡亦金之遺老金之視元猶宋之視元也許衡仕元未有議之者獨苛於吳澄何

耶非論之平也伏查雍正二年

世宗憲皇帝諭令廷臣釐正

文廟祀典經九卿諸臣議准宜復祀者六人宜增

祀者二十人獨吳澄一人未經議及

臣蒙

皇上天恩畀以三禮館總裁伏見吳澄所著禮經諸

書援据精切義理融貫闢俗學之淺陋發前聖

所未發實能羽翼經傳昭示來茲按祀法有功

於聖道者則祀之今澄著述之功彰彰具在未

便置之不論茲欽逢我

皇上崇儒重道正禮明禋集道統之大成晰羣疑於
千古此時若不亟請復祀則澄之真儒實學終
湮沒而不彰矣合無仰懇

勅下廷臣集議將吳澄仍准入祀廟廷不獨為先儒
表揚遺徽將使正學日隆人心胥勸風聲所樹
洵足開萬世太平之基矣

三老五更議

乾隆二年

張廷玉

臣伏思三老五更之名始見於禮經蓋古養老尊賢之禮也考養老之禮如王制內則所云則虞夏殷周皆然又云五帝憲三王有乞言則伏羲神農黃帝以來已然是其典為最古至所云食三老五更於太學天子袒而割牲執醬而饋執爵而醕冕而總干是其禮為最隆我

皇上至道在躬式稽前典以三老五更之禮下詢甚盛心也顧禮待人行事因時起臣妄叅臆議以

為未可舉行者約有數端

皇上至德淵懷

聖不自聖何難屈禮臣下但

天子有所施必令臣下有可受如所云袒而割牲者
其始親袒衣割牲以為俎食也執醬而饋者其
繼執醬以饋熟也執爵而醕冕而總干者既食
畢又親執酒以醕口且又端冕舞位而以樂舞
侑食也禮如是不已重乎古有斯禮而今未行

似非

皇上殷殷復古之意如特行此禮度臣下誰敢受者
此其難行一也漢宋均曰三老乃老人知天地
人之事五更乃老人知五行更代之事者各以
一人為之所謂知天地人之事者蓋上通天文
下徹地理中察人倫三者明一亦已難矣況兼
之乎所謂知五行更代之事者如伏羲以木德
王故風姓代之者火也炎帝以火德王故曰炎

帝以火紀官代之者土也黃帝以土德王故曰
黃帝之類此非洞達天人之際孰能知其所以
然者惟其有如是之德是以天子隆以賓師之
禮三公九卿皆在執事之列今此禮果行必求
其人以當之竊思致仕諸臣及現在居職者誰
克任之恐

皇上即下明詔而其人必悚惕慚惶而不敢應此事
之難行二也考漢以李躬為三老桓榮為五更

魏以王祥為三老鄭小同為五更周武帝以于謹為三老其時五更無人第未審諸公如前所述之三老五更果克副其名而無愧乎園橋觀聽漢明帝時極盛然先儒胡寅譏桓榮僅能授經章句不知

仲尼修身治天下之微旨故所以輔翼其君者德業不過如是觀先儒之論是桓榮猶不免譏評下此者何足以當鉅典此其難行者三也三老

五更之名雖見於樂記祭義文王世子諸篇然
不言何代如以為虞夏殷周皆然則二帝三王
大經大法載於尚書何二典三謨不見有老更
之名如以為惟周有之則保息養老見於司徒
獻鳩以養國老見於羅氏以財養死政之老見
於司門三百六十如是之詳且悉何亦不載有
老更之名臣愚以為養老之禮古時典制可稽
至所謂三老五更者疑屬漢儒附會此其事未

可盡信是以唐宋至今已千餘載此禮未曾舉

行即

本朝

世祖

聖祖

世宗皇帝重道尊師明經造士事事度越前古而於老
更之禮亦未之及蓋以典至古而禮尤隆名實
難副倘有幾微未稱必滋議論之端豈不褻

至尊而羞大典乎此事似應停止舉行不必

勅下廷議

臣敬陳管見伏祈

聖鑒

詳籌官學事宜疏

乾隆三年

孫嘉淦

竊惟八旗官學培植人才於根本之地所係綦重現在額設助教以董其成考取教習以分其課其中又有兼習算法之人復有教弓箭之烏拉齊教蒙古話之巴克式等至於世職官員世

家子弟俱令入學讀書立法可謂詳且備矣但教員多而授教無序講課雜而肄業不專學生狃於淺近而無由大成臣職思訓課謹將應行事宜悉心酌議為我

皇上陳之一學生之課業宜專也查八旗官學每旗額設滿助教二人以教繙譯漢教習五人講解四書入學之期辰集酉散每日不過四時例以二時習滿文二時習漢文而又有弓箭算法等

功分時教授計一學之中滿洲漢軍之子弟約有七八十人兩助教不能遍行訓誨而漢教習於二時之中亦不能多所講誦往往肄業數年而經書未周不惟博學明通之人無由槩見求其精通繙譯者亦猶難之蓋學無專業故也請嗣後八旗子弟挑選入學三年之內令其專習經書朝夕講課三年之後臣等考驗擇其材質聰穎有志力學者歸漢文班分隸教習令其專

心講誦其年齒已長願學繙譯者歸滿文班分
隸助教使之專習繙譯其該學一應事務仍著
滿助教辦理臣等不時稽查漢文之勤惰責之
教習清文之勤惰責之助教如此則教者有專
司學者有專業庶隨其材質之高下可以有所
成就矣一人材之造就宜大也查官學舊例其
學繙譯者考筆帖式而已間有粗通文藝者考
文武生員而已原以明經治事之實學非旦夕

可致之功修是以未敢專定其章程查國子監拔貢人等現蒙

皇上天恩月給廩餼講求明經治事之學現今頗有端緒

臣

請將八旗官學生之歸漢文班者不必

專讀四書亦使之講求經史為有用之學每三年一次

臣

等錄其可以應考者奏請

皇上欽點大臣來監考驗取其明通者授為監生由官學而升之太學使與拔貢人等明經治事期

滿之日擇其尤異者一體保舉考選錄用如此則旗人子弟必多篤志好學之士異日服官莅政必收通經博學之效此亦樂育人才以襄治理之一端也一算法教習宜停止也查雍正十二年果親王允禮奏請八旗官學添設算法教習十六員教授官學生算法太僕寺少卿成德總管其事每旗官學擇資質明敏者三十餘名定以未時起至申時止此一時中學習算法其

教習因各有職守間日來學一次至今三年有餘伏思

皇上設立官學慎選師儒教養八旗子弟專以讀書繙譯為業以備將來錄用至於算法一藝理數精微非童稚所能驟通況以一時之頃教授三十餘人勢亦不能遍及既分讀書繙譯之功而算法又無成效臣等伏查算法係欽天監衙門事務其如何教習錄取之處應交與總理算學

太僕寺少卿成德會同欽天監酌量辦理其臣衙門官學生學習算法之處請行停止使得專功讀書繙譯則功課不致兩誤而學業可成矣一蒙古喇嘛宜撤回也雍正十年果親王奏請八旗蒙古學添設喇嘛八名俱由理藩院行文於甘朱爾巴諾悶罕處移取繙譯經文熟練者揀選補用伏思蒙古學生蒙

皇上天恩薰陶已久實與滿洲無異學習蒙古繙譯

專以清書為程式務在發明理蘊始於政事有
資其教習蒙古話並繙譯之處自有蒙古助教
巴克式專司其事無煩添設喇嘛況今喇嘛等
交冬來京入夏即告假回伊本處既不能常行
督課且糜費錢糧供給實屬無益臣等請將喇
嘛收回凡一應蒙古繙譯蒙古話專責成於蒙
古助教巴克式等用心教習務使著有成效可
也以上各條謹就官學應行事宜悉心調劑期

於學校實有裨益是否有當伏乞

皇上睿鑒施行

請裁外肄業生疏

乾隆三年

趙國麟

竊照太學肄業貢監生額設三百名在內肄業
一百八十名在外肄業一百二十名但在外者
多係覓館授徒不能實心應課學業不專在內
者因有在外亦可肄業一途未免擇便而趨以
至去來無定伏念太學為育賢額俊之地貴務

實學以儲真才而不在額數之多與其兼設內
外兩缺而學業無所成就不如單設在內一缺
使其專心致志以務實學請將在外肄業額數
裁去止留在內肄業一百八十名缺詳慎考取
嚴加督課每名月費二兩之外增給銀五錢則
膏火益加寬裕諸生得以安心肄業無自便之
途免荒怠之習似於造就人才之道不無裨益
請甄別期滿貢生疏

乾隆四年

趙國麟

竊查貢監生並係陸續到監肄業是以期滿之後參差不齊兼或以事故請假甲去乙來新舊遞易現在肄業諸生除挑選佐貳並考補教習及告假回籍外尚有一百四十八名其中期滿者止有二十餘名若槩行請

旨引

見則與原議之例未符若止就此二十餘名內擇其人品學問稍有可觀者奏請引

見亦非核實慎重之意臣伏思恩拔歲副等貢生在
監肄業除期滿照例咨部聽其考職及銓選教
職外又有考補八旗教習並挑選佐貳等例是
其出身之途已為通廣我

皇上樂育養士之恩亦云厚矣若非人品學問實在
超越出眾之士臣等徒以循例保薦塞責於心
實有未安且恐希圖躁進者皆得生心徼幸殊
非所以養士品重名器也請嗣後太學課士之

法宜照陞任總理國子監事孫嘉淦所奏分經義治事將諸生撥堂肄業歲終仍照前任兼管國子監祭酒邵基所奏除挑選佐貳考補教習外其肄業期滿者照例咨部銓選教職其未滿之貢生詳加揀選如有人品端謹學問通順者准其留監肄業其餘照例咨回本籍其有實在資斧不足難於回籍者照孫嘉淦原奏內調助之例量加資給令其回籍歲終照例舉行一次

如此則肄業諸生既有出身之地而來歲係直
省舉行選拔之年將來貢八成均有志肄業者
又不致有壅阻無缺可補之患至現在肄業之
監生應照例一體揀擇分別去留其留監肄業
者俟伊等期滿後臣等照例咨送吏部其應作
何錄用之處統聽部裁至嗣後肄業貢監期滿
之數果多其中如有實係才品卓越學識醇正
者臣等仰體

皇上加意人才之盛意仍照原議核實保薦以示鼓勵再查南學學規向來並未奏明誠恐日久漸弛以致諸生罔知遵率謹將擬定學規另繕清單恭呈

御覽伏候

睿旨遵行

謹按南學學規
詳載生徒門

請復外肄業生疏

乾隆六年

劉吳龍

竊查太學肄業貢監生從前額設三百名在內
肄業一百八十名每月每名各給膏火銀二兩
在外肄業一百二十名每月每名各給銀五錢
續於乾隆三年十二月內兼管監務趙國麟等
奏准在外者多係覓館授徒不能實心應課請
將外肄業額數裁出止留在內一百八十缺每
月每名二兩之外增給銀五錢但查本年係直
省拔貢之期例應赴部考驗劄監肄業將來陸

續到京不下千有餘人臣等即慎加遴選亦必有數百名之多若拘於現在定額恐其材質可造之士不無遺棄殊為可惜且諸生所處豐儉各有不同查從前在外肄業者特以迫於家計覓館授徒良非得已原議每月給銀五錢供其赴監飯食之用其按旬應課與在內無異實無掛名曠業情弊今臣等公司酌量不必另增額數請即於一百八十缺之內撥出二十四名作

在外肄業之缺計其公費可給百二十人臣等
仍詳加考驗分隸六堂倘月課季考應行齊集
之期有曠怠不到者即行扣除如此畧為變通
凡材質可造之士悉收之太學之中我

皇上作育盛心普被無疆矣

請令拔貢生考到考驗疏

乾隆十一年

宗室德沛

竊照禮部來文奏請通變拔貢

廷試一摺內開嗣後凡有到部拔貢經部驗到即

劄國子監會同臣部堂官嚴行考試如果文理
通者准為拔貢留監肄業是考取一二三等准
貢之人俱歸臣監肄業伏查臣監肄業生徒定
有額數除拔貢之外尚有各項貢監生理宜慎
加遴選以仰副

皇上作養人才之至意向例凡貢監生到監先行考
到列一二等之人再行考驗貢生考列一二等
監生考列一等者方准留監肄業餘俱不錄是

以向來原有缺額今禮部會同臣監考取准貢
之人若一概留監肄業恐將來各省拔貢陸續
到監未免人浮於額請照臣監現行之例准作
貢生之人仍與各項貢監生一體赴監考到考
驗錄取肄業不得過於額數即額數之內亦寧
缺勿濫庶甄別既嚴而流品不雜矣

請增派分獻官疏

乾隆十一年

鄒一桂

竊照聖門弟子父子同列配享者分位於前後

殿兩廡周程張朱蔡之父列位於後殿之兩廡
同一義也每年春秋二祭前後殿四配自應均
行獻禮乃後殿自

詔封

五王以來四配位前雖有陳設而無進獻反不同
先儒之父尚有助教人員為之分獻於禮殊為
缺失揆厥所由蓋因舊止

啟聖王位前上香獻帛進爵後即旁及四配嗣

五王神位各行三獻禮已紛繁人亦勞瘁遂畧去

四配獻儀父既不獻何以安前殿四子之心本

月丁祭臣於後殿監禮與主獻之臣酌定於

五王行獻之後即獻四配但禮已畢而後殿三獻未完且將來主獻之人亦有高年不能勞頓者

臣請嗣後令國子監堂官於助教內增派分獻

官二員臣寺亦增派贊引官二員分行後殿四

配獻禮則事不勞而禮無失矣再後殿四配前

陳設雖有四案而帛止兩端亦應添補祀典攸
關未敢因循擅便伏乞

皇上訓示遵行

請

頒發三禮疏

乾隆二
十年

觀保

竊惟五經皆載道之文而三禮為經世之典

國家重道崇儒敦尚經術易詩書春秋歷蒙

聖祖

世宗欽定折中傳說刊刻頒行

臣監奉到

頒給各經分給六堂令助教等官與諸生講貫每月考課挑問經疑其有成誦在心條對無誤者拔置優等量給獎賞以期仰副

國家造就人材之意伏遇我

皇上道隆作述學有緝熙

特命儒臣纂修三禮進

呈

御覽恭蒙

欽定茲已刊校成書

頒發直省成均士子傾心積願欲覩全經環顧陳請
為此繕摺恭

奏仰懇

聖恩賜給三禮六部分發六堂俾諸生以時講貫則
五經全具文教之光炳於日月矣

請刻

御製古槐詩疏

乾隆二十四年

觀保

竊惟孝治推恩庶徵協乎草木文明敷教盛事
播於宮牆覲育物之深仁慶作人之雅化查太
學西講堂前古槐一本考之帝京景物畧為元
臣許衡手植年湮代遠節斷心空稽諸故老傳
聞未覩發榮滋長乾隆辛未年恭遇

皇太后六旬萬壽普天共慶四海同春起視斯槐欣逢
是歲始而萌芽驟出繼而枝葉交舒涵濡倍捷

於土膏鬱葱遂甲於槐市菁莪棫樸無以喻其
發生朱草華平未足方斯符驗是蓋彰

一人之孝感沐

聖母之春暉用以錫繁禧而光文運者也大學士臣蔣
溥以丁祭奉

命行禮齋宿講堂祭重祭之日月摩古幹於風雲繪
以成圖恭呈

御覽蒙

皇上御製五言六韻排律一章紀瑞則讓善

璇宮敷藻則騰輝壁水爛漫星雲之彩鏗鏘金玉之音
傳誦已徧於園橋篆刻宜垂諸珉石伏睹

聖祖仁皇帝御書大學聖經刻石於彝倫堂我

皇上御製訓飭士子文刻石於率性堂並皆照耀黼
宮流傳璧府臣等擬遵此式敬刊

御製詩於西講堂正中面臨古槐以彰協應仰懇
萬幾餘暇煌煌

宸翰親揮庶令首善觀瞻奕奕

天章遠耀則赤文綠字燦若琳琅鐵畫銀鈎光於琬琰壯儒林之勝概地靈將物產俱華集

盛世之休徵天瑞與人文並麗矣臣等謹繕摺請
旨如蒙

俞允並請將臣等奏摺附刻下方以悉原委俟臣監
石工告竣之日懇

皇上飭交

御書處遴選工匠敬事雕鐫傳之萬禩永永無極

請修

御書樓疏

乾隆二十五年

觀保

竊臣等前因國子監衙門年久傾圯奏請修理

欽奉

諭旨交莊親王等派員興修現在估計開工茲准該

處移咨樓房十五間應行拆卸臣伏查樓房乃

尊藏

御書之所久為觀瞻所係況直省府州縣

文廟俱建有尊經文昌等閣成均首善之地規制
更宜詳備且此樓近接

文廟尤當慎重謹會同欽天監常日暄悉心相度
據稱係

文廟後護於方向屬艮於五行屬火文明之象必
不宜拆再此樓牆垣磚瓦雖有殘缺而木植尚
屬堅固似可毋庸拆毀仰懇

聖恩仍舊存留稍加修葺即可一律整齊謹據實具奏

議劉天成請定成均大課奏

乾隆二十九年

永貴等

臣等伏思學校為長育人材之地考課不厭其詳但查國子監祭酒司業以至六堂助教等官按時各有課程立法本為嚴密其肄業各項貢生上之應試入穀不難自奮功名次之考充教

習果能化導有方年滿帶領引

見分別錄用其又次者隨衆肄業雖無過人之文行而老成可為師範三年滿日亦准以教職銓補至於衰庸頽廢之輩必不能遠赴成均是各項貢生在監其能考取教習及三年報滿例銓教職者均係有志向並非委靡不振苟且姑容可知該御史乃以此等貢生僅予隨時分課於立學成材之意尚有未盡請另增春秋大課每

歲二八月請

旨特派大臣考試三年報滿合計等第錄用查

國家取士大比尚待以三年而貢生考課轉於一

歲之中兩經

特簡大臣考試其輕重未免失宜且如該御史所稱
必俟三年六考而後總核等第則此三年中如
有中式而去者或有充補教習者是前此屢居
一等徒為虛設而

欽點大臣之衡鑒亦屬具文況現在科甲選班守部
需次者尚多若又增貢生一項咨送吏部帶領

引

見錄用是為仕途開一捷徑竊恐考課之時無識者
妄思倖進適起奔競之端於學校抑浮崇實之
方殊無裨益應將該御史所請均無庸議其現
在肄業各生國子監堂官按季考課立有課程
應請責成該堂官嚴加考試分別等次倘有如

該御史所指急於學業者應令該監堂官遵守
教規嚴核文品隨時區別以示懲儆恭候

命下遵奉施行

議曹學閔請建壁池奏

乾隆三十三年

觀保等

臣等議得古帝王立學之制不同六經所載儒
者之說亦復互異惟敦典立教建學興賢之道
則百世聖人莫不符合是以王者惟當審其道
之同而不必強合其制之異恭惟

皇上立極建中垂教天下所以明倫興學典章制度之大固已憲章前王折衷

睿慮實兼

聖作明述之美若乃宮舍形制古今異宜其與古合者不足以增益

熙明其不必與古合者亦無關於治化今御史曹學閔陳奏以三代所共者學而辟廡之制著於詩禮

國朝立制並則古昔獨辟廱之制缺然未舉請增

建太學璧池

臣

等伏考辟廱之名始見於靈臺

之詩其指為天子之學則始見於王制先儒並
以為周文王始作辟廱原非三代所共之學毛
萇詩傳曰水旋邱如璧曰辟廱以節觀者鄭元
詩箋曰築土壅水之外圓如璧四方來觀者均
也據毛之說則因自然之邱而引水環注據鄭
之說則因自然之水而外束以圓隄為說已自

不同然總為行禮之時慮觀者擁遏而設與明
倫設教之意本不相關蓋古者太學在郊故孔
穎達正義云辟廡內有館舍外無牆院後漢書
稱園橋門而觀聽者蓋億萬計是由外無牆院
故得園橋門而觀之也今太學在

都城之內立

廟以奉

至聖分舍以館諸生堂宇深嚴較之引水以過人

行更爲周密何必執泥古法疏鑿無用之溝渠
我

皇上重道崇儒尊飾

聖廟棟宇階陛以至屋瓦皆依王者之禮已足愜
四方觀瞻之願勵多士景仰之心其引水旋邱
乃周人一朝之制非千古必不可廢之經苟或
禮當建設又豈礙于更張况膠庠聲宗代各異
名何曾沿襲帝王建學自有教養之實政而必

拘泥形制以復古為名亦何裨于學校應將該御史所奏請增建太學壁池之處毋庸議臣等未敢擅便謹題請

旨

詔建辟雍工程估計錢糧數目奏

乾隆四十八年

德保等

臣等欽奉

諭旨稽古國學之制天子曰辟雍所以行禮樂宣德

化昭文明而流教澤典至鉅也朕此次

釋奠禮成念國學為人文薈萃之地規制宜隆而辟
廡之立自元明以來典尚闕如自應增建以臻美
備派禮部尚書德保工部尚書兼國子監事務劉
墉侍郎德成敬謹前往閱視度地鳩工諏吉興建
落成之日朕將舉行臨雍典禮以昭久道化成之
盛欽此欽遵臣等遵即揀派禮部郎中巴彥寶南
苑郎中董楷工部員外郎富森阿主事恭安和

琳委署主事福興率同前往敬謹詳細逐一查勘得國子監恭建

辟廱重簷大殿一座下簷見方六丈五尺柱高一丈五尺五尺方臺一座見方十一丈二尺高一丈五尺圓河一座裡口徑過十九丈二尺深一丈平橋四座各長四丈寬二丈二尺丹陛二道湊長二十一丈九尺寬二丈二尺殿座前海墁二塊湊長十丈彞倫堂月臺前海墁二塊湊長十六

大俱寬四丈八尺五寸太學門外東西井各一座挑砌進水暗溝二道併六堂後簷外東西各有井一座亦應挑砌進水暗溝各一道以資灌注共湊長九十七丈出水暗溝二道自圓河至集賢門外湊長九十四丈自集賢門外挑砌洩水大溝一道至東大街官溝止長八十一丈以及添安礮礮海墁散水拆砌月臺併紅銅簷幪銅鍍金看葉瓦帽見廣識大鍍銀槽活等工臣

等按例詳加核算共估需物料工價銀十一萬三千四百九十八兩七錢九分七釐所需架木毡簾雨搭等項行文工部在于製造庫辦造木倉取用顏料等項行文戶部取用其鋪墁地面二尺金磚二千五百八十七塊現在工部存貯僅止五百餘塊不敷應用行文江蘇巡撫燒造于明歲秋前尅期運送到工至所需柁樑椽柱各項木值共估銀一萬五千五百二十三兩四

錢二分六釐查此項木值向市購買徑寸不能相符查賢良祠官廠亦無存貯長徑丈尺合式之件相應將前項木值開列清單奏請

勅交熱河副都統照依單開丈尺徑寸數目敬謹採辦于本年冬月趨運到工以便興做所估木值銀兩扣留戶部庫內無須支領外其餘淨估需物料工價銀九萬七千九百七十五兩三錢七分一釐請在戶部庫內動支謹將約估物料工

價銀兩數目另繕清單恭呈

御覽俟

命下之日臣等行文各該處支領取用即令派出之
員等及時購辦物料并行文欽天監于今歲冬
初擇吉破土興工臣等仍不時前往督率稽查
指示敬謹辦理務期堅固妥協以昭

盛典而垂永久統俟工竣將用過工料錢糧據實
奏銷謹

奏請

旨

詔建辟雍添造牌樓碑亭鐘鼓廳估需錢糧數目奏

劉墉等

竊臣等于本年五月初六日經臣金簡將國子

監新建

辟廱殿前擬添四柱三樓木牌樓一座兩旁各添
建碑亭一座又查彝倫堂前舊有鐘鼓廳二座

今在

辟廱殿後于體制不合擬于牌亭之南添建鐘鼓
廳二座畫樣一張并國子監全圖一張恭呈
御覽奉

旨辟廱殿前著照海寧海神廟石牌樓式樣建石牌
樓一座碑亭鐘鼓廳著在石牌樓四角前後對中
建造欽此又于初七日經臣金簡面奏如遵

旨辟廱殿前建石牌樓一座所需石料較多恐于明

春趕造不及等因奉

旨著照大西天琉璃牌樓式樣建造琉璃牌樓一座
欽此隨于是日將燙得

辟雍殿前建琉璃牌樓一座琉璃牌樓東南西南
角各建鐘鼓廳一座東北西北角各建碑亭一
座燙樣恭呈

御覽奉

旨俱照樣准做欽此欽遵臣等查得大西天舊有琉

璃牌樓一座計三間通面闊七丈四尺高四丈
現在

辟廱殿連擎簷廊通面闊七丈五尺高三丈四尺
五寸即照此樣尺寸建造庶覺配合適觀又牌
樓東北西北角添建重簷琉璃碑亭二座每座
四面各顯三間內明間面闊八尺二寸次間各
面闊六尺柱高一丈四尺五寸上簷斗口單昂
溜金下簷斗口重昂斗科內裡隔井天花上下

簷七標歇山成造裝修四面明間安柵欄四槽
簷牆八堵青白石碑二統通高二丈寬五尺四
寸厚二尺六寸又東南西南角添建鐘鼓廳二
座每座一間各見方一丈四尺柱高一丈六標
棖棚歇山斗口麻葉斗科成造裝修前後簷安
六抹栲扇二槽兩山安四抹欹牕二槽臺基露
明高五尺並鋪墁地面油飾彩畫搭做圈廠拉
運木值並架木車脚等工除所需顏料桐油架

木照例由戶工二部取用又松檉木值按照原
估根件料數由官木廠領用核值銀三千九百
七十九兩八錢三分六釐暫行存庫不領倘該
廠有長徑丈尺不敷之件仍令該監督等呈明
領項及時購辦合對應用外所有辦買各項物
料並各作工價運價共估需銀三萬三千七百
七十兩六錢五分四釐請按銀七錢三之例由
戶部支領臣等揀派委員先行赴時趕辦各項

物料上緊修做務于明春

聖駕臨廂之前一律告成無誤統俟工竣另行分晰
各款據實查銷謹將估需工料銀兩細數另繕
清單一併恭呈

御覽謹

奏

詔建辟雍請修葺彝倫堂及六堂等奏

蔡新等

臣等恭照本年二月奉

特旨仿照禮經舊制創建辟雍落成之日舉行

臨雍典禮現在董事諸臣飭工庀材敬謹辦理凡大
小臣工執經髦士靡不欣躍騰歡快覩千載難
逢之

盛典臣等敬查辟雍在

彞倫堂之前六學講堂及繩愆博士等廳俱分列

左右乾隆二十四年蒙

恩發帑修理國子監堂廡及東西兩廂迄今已二十
五年木植磚瓦間有糟壞油漆彩畫漸多剝落
恭逢

鉅典新建辟雍其前後左右似當一體整新同彰赫
奕則

鑒輅親臨之際益足崇體制而壯觀瞻可否仰懇
皇上天恩勅交工部料估興修抑或即交辟雍工程
處增估兼修一體報銷以昭美備為此具奏請

旨

文廟工成

聖駕親詣釋奠恭進詩冊表

乾隆三十四年

陸宗楷

伏以

光榮璧沼三雍垂乾象之模

禮重膠宮五宿燦天庭之色

峻典日臻乎美備祀事休昭

鴻儀倍極乎周詳文明大啟肅千秋之俎豆犧尊與

龍勺增輝煥萬仞之宮牆朱拱與丹楹並麗興
秩節而儒宗丕振自古云然隆學敷而

師道昭宣於今為烈原夫斑麟吐紱瑞應星芒赤
雀銜書符徵斗曜擅首出於天開地闢集大成
而玉振金聲惟聖人為百世之師若

孔子則生民未有是以三千弟子宗洙泗而心儀
歷代帝王祠黼宮而展禮粵自太牢肇祀沛功
成逐鹿之年王禮隆封唐運啟躍龍之日

先聖稱於武德太師贈自乾封秩重經師陳二十
一賢之灌獻爵隆高弟繪七十二子之冕旒杜
之偉樂府新詞登歌作譜裴世期元嘉舊議侑
舞傳儀厯考曩編代多隆禮然而一十四君之
釋菜儀文畧具當年二千餘載之傳新妙契正
逢

今日欽惟

皇帝陛下

道統君師

功光天地

因心作則接堯舜禹湯文武之傳

吐詞為經闡詩書易象春秋之蘊念終始典於學
褒顯儒風於緝熙單厥心宣揚聖教闡文隆道
訐謨遠軼前王法

祖尊

師盛業祇承

列聖溯鴻圖之締造正文運之初開東土肇基首示崇
儒之典萬邦底定宏興立學之謨謚刊千載之

誣禮晉

五王之秩增常員於博士

沛異數於上公十一頃

國賦新蠲五百戶土田載錫留

紫垣之華蓋輝耀奎躔分

黃閣之崇儀制隆魯殿闕里之庭楹疊煥成均之廡

序頒新

御贊五篇

寶翰燦蛟龍之色璇題四字雲楣懸日月之光是蓋規模經久而日宏益知典禮至

今而大備洪惟

聖王繼統景運重新方當

御宇之初已肇崇

師之秩隆

一人之敬事特

沛溫綸撰二月之良辰

躬親釋奠

詔易三重門宇犀看龍鳳飛翔黃鋪六樣琉璃頓見

鴛鴦燦爛

盛烈垂諸宇宙昭勒貞珉

宸題炳若日星高懸綵殿夾鍾南呂均調韶樂之詞

爵筵登鉶盡屬尚方之式固已

道超古哲

德懋

先型邁漢觀之宏儀休風尚矣樹虞庠之極則懿典昭
焉乃今者

龍飛三十二年

念國學實觀瞻之地

帑發二十餘萬

勅廷臣興繕葺之功涓日而上應星躔晷臨營室飭

匠而廣收地利材庀蒿衡惟萬民共仰師資斯
百工咸趨父事由是虹梁畫棟日麗丹黃松楠
蘭椽霞浮金碧十二戟應天之數羅星象於朱
門六十楹擬帝之模綬雲容於紫殿華廡之瓊
簷翼翼焜煌卓越前模崇祠之碧宇層層輪奐
備增昔日歲越匝周功方告蒧刊明臣之陋議

頌

文廟之新題綜羣聖而集成

睿德顯徵諸三字彙六經而垂訓

宸謨昭揭於兩楹況復

御撰雲章

躬揮奎畫荷琳琅之屢錫勒琬琰以垂休文成鶴翥
龍盤陋英宗之作記筆似鸞騫鳳舞羞元帝之

書碑矧

頒內府之珍藏又屬姬朝之儀器豈曰圖誇博古侈

張漢室雲雷實云志慰從先用

錫周家簋簋當斯時也廟貌惟新

皇儀備舉落成而肅

親臨之典千年長此明禋

釋奠而嚴展謁之文萬方於焉觀聽駐

玉輅而橋門生色樂和與禮備咸臻酌金罍而籩豆
靜嘉潔藻與芳芹並薦三獻之儀邃穆九成之

奏鏗鏘千官鵠立鵠行盡入

聖人之域多士鳬趨雀躍親依

天子之光此皆

熙朝建崇道之猷鴻規翊振

聖世擴右文之量盛治駢宣是以

德教覃敷

文思廣被

紹心傳於十六字道炳中天

布聲教於千萬年化成率土曳青蕉而鼓篳豈徒東

海波臣襄黃幘而橫經匪直中山胄子臣等職

分壁館寵籍環林學媿懸鐘竊光耀於文昌之
宿材慚砥劍宣

德澤於教化之宮嘗稽漢祖臨雍亦且明堂作頌寧
際周王建學肯令樸棧無歌矧蘭臺著作之才
冀儲黌舍則槐市頌揚之雅敢上

彤廷爰采諸生對菲之詞敬作

盛世芻蕘之獻彙成百冊裝潢十函千冒

宸嚴恭呈

御覽

詔建辟雍

聖駕親詣釋奠講學禮成恭進詩冊表

乾隆五十年

蔡新

伏以

熙朝慶洽敷天徵聲教之覃

茂典光昭總宙仰文章之煥

制作百卅年而大備雅化聿興

國家億萬載之丕基鴻規悉裕於論於樂酌古仍
準乎今是訓是行稱名必衡其實欽惟

皇帝陛下

乾符久照

泰運時雍

德者福基大衍啟升恒之祚

禮為教本中天揚格被之庥

君道師道交隆用式文王之典

國學鄉學異制欣依

天子之光允矣

化成烝哉

澤普蓋豐鎬之人材為最盛而辟雍實教化所由施
自漢晉僅襲靡文規模已隘逮元明罔修軼典
禮樂未遑恭逢

盛世右文

宸衷稽古

功崇獨斷歡愜羣情地營講舍之前榮踰卜文昌之

上位

建其有極邁明堂五色之文禮貴從宜陋往牒三雍
之說肉倍好之謂璧義兼乎象海象天水旋邱
而為池形合乎中規中矩疇曰土深泉遠川固
晝夜如斯第須綆汲筒輸井之時義大矣仰承
指授寬予歲時幸工歲之屆期喜子來之奏效爰卜

上丁之吉剛逢書亥之辰

翠輦揚和青旗應候戟門由右表

帝德之淵冲

幄次在東展

天儀之肅穆蕭燭映尊彝之色十器璘璠堂階奏韶
護之音九成諧暢極幣帛牲牷之盛

崇拜登灌獻之文惟

帝能自得

師羹牆如見化民其必由學耳目方新乃

莅澤宮

御講座虬鐘徐動鼉鼓載鳴句牖於以傳呼衆籟於
馬屏息鵷班六拜臣子容修弟子之儀雁翼兩
行執經許就談經之席測蠡而陳管見才愧戴
憑伏地而凜

天威悚踰王導竊喜

德音之宣播咸聞

聖蘊之宏敷學莫大乎敦倫

提要道以為型範功莫深于行健
舉至誠以示津涯在顓蒙詎識夫

高深而

啟迪自神其鼓舞維時環橋觀聽溢宇惟愉備三千
七十之徒數與

孔門適合萃南北東西之衆

教踰周室而遙齒列達尊乃有百齡上壽圖兼王會
不遺小國陪臣至於鄒魯儒生聖賢世系膺上

公之爵守博士之員莫不鵠立鳬趨挹文漪於
學海雲蒸霞蔚振修翼於天衢

隆禮既成

湛恩大沛

尚方文綺光騰五色之雲

內府瓊膏香汎三巡之琰捧朱提之璀璨品重雙
金增丹桂之連蜷價同片玉雖湛露蓼蕭之什

無由方

聖主之鴻施即菁莪凡樸諸詩詎足擬

昌辰之釀化况

祀舉夾鍾之月正雨占潤礎之時穗預兆乎兩岐花
乃飛其六出澤下尺即生上尺斯民久驗嘉符
農有年而士逢年是日尤昭

景貺

誠孚

至聖祥霽表積玉之華

德廣

大生時雨啟芳春之澤

絲綸疊被

俯矜立雪之愚忱

錫賚優加益遂瞻

天之至願若夫豐碑琬琰

奎藻琳瑯

記昭萬世之模

說證諸儒之誤所以

正人心而崇實學務勉為有用之儒

宣

祖德而裕貽謀彌長保無疆之福臣等職司蛾術詞類

蠅鳴摹

日月之光華惟懸謗陋比巷衢之歌舞勉効頌揚爰
合諸生鼓篋之謠敬陳

化日舒葵之志哀成二百八冊裝潢二十六函干冒

宸嚴恭呈

御覽

欽定國子監志卷五十四